

**Inuusuttut 18-t norlugit ukiullit unnukkut nalunaaqutaq 20:00-p kingorna Cafèliarlutik kakaoitorsinnaanngornissaat, sodavanditorsinnaanngornissaat assigisaannilluunniit najoqqaasinnaanngornissaat pillugu Imigassaq pillugu Inatsisartut Inatsisaanni § 20 imm. 4 atorunnaarsinnissaanut siunnersuuteqaqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. (UKA2018/52)**  
(Inatsisartunut ilaasortaq Malene Vahl Rasmussen, Demokraatit)

**Imigassaq pillugu inatsit allanngortinniarlugu siunnersuummik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasillutik niuertarfiit imigassanik aalakoornartortalinnik nioqquteqarsinnaalersillugit ataasinngornermiit arfininngornermut nalunaaqutaq ullaakkut quliniit unnukkut arfineq- pingasup tungaanut. (UKA2018/53)**  
(Inatsisartunut ilaasortat Justus Hansen aamma Randi Vestergaard Evaldsen, Demokraatit)

**Imigassamut inatsimmi imigassat aalakoornartortallit pillugit pilerisaarutit suulluunniit inerteqqutaanerata atorunnaarsinnissaa imaluunniit allamik taama sakkortutigisumik taarserneqarnissaanut Imigassaq pillugu Inatsisartut inatsisaata allanngortinnissaanut allannguutissamik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. (UKA2018/54)**  
(Inatsisartunut ilaasortaq Randi Vestergaard Evaldsen, Demokraatit)

**Imigassaq pillugu Inatsisartut inatsisaani §28-p atorunnaarsinnissaanut siunnersuuteqaqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasilluni imigassaq nioqqutissanut allanut naleqqiullugu saagorsimajunnaartussanngorlugu. (UKA2018/55)**  
(Inatsisartunut ilaasortaq Randi Vestergaard Evaldsen, Demokraatit)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

### **Siullermeerneqarnera**

Aalajangiiffigisassatut siunnersuutit siullermeerneqarnerani ataatsimut oqaluuserineqartussaammata Naalakkersuisut ataatsimut akissuteqarput.

Inatsisartut inatsisaat ukioq kingulleq upernaakkut Inatsisartuni amerlanerussuteqartut akueraat. Imigassamut inatsit taamanili oqallisigineqarpoq, poliitikerit innuttaasut akornanni annertuumik inatsit akerliuffigineqarlunilu tapersorsorneqarpoq. Demokraatit inatsit ilaannut aalajangiiffigisassatut siunnersuummik saqqummiussipput.

### *Oqal. 52:*

Inatsisartuni ilaasortaq Malene Vahl Rasmussen siunnersuummik nassiussivoq Naalakkersuisut imigassami inatsimmi § 20 peqqullugu.

Imigassaq pillugu Inatsisartut inatsisaanni §20, imm. 4-mi inuusuttut 18-it inorlugit ukiullit nal. 20 kingorna angajoqqaamik, angajoqqaatut akisussaataasumik imaluunniit inersimasumik sassaalliuteqartarfimmi inuusuttumut immikkut akisussaassuseqartumik ingiaqateqarnissaannik aalajangersagaqarpoq. Aalajangersagaq taanna inatsimmik atuussimasumik ingerlatitseqqiivoq. Aalajangersagaq imerniartarfiunerusut imigassaq pillugu akuersissuteqartarallarmata atuutilerpoq. Taamani aalajangersagaq ajunngitsumik isumaqarluni akuersissutigineqarpoq, tassa ukiukitsut imerniartarfimmiinnginnissaannik qulakkeerinnittussaagami.

Taamanimiilli – pingaartumik illoqarfinni anginerni – caféqalerlunilu sutorniartarfeqalerpoq pingaartumik nerisassanik kaffimillu aamma imigassamik annikinnerusunik sassaalliuteqartarfiusunik. Taamaattumik Naalakkersuisut aalajangersagaq allanngortinneqassanersoq takorusussinnaavaat, inuusuttut 18-it inorlugit ukiullit taamaalillutik imigassaq pillugu akuersissummik peqarfiusumi nal. 23-p tungaanut isersimasinnaaniassammata. Inuusuttut taamaalillutik inersimasumik ingiallorteqarnatik neriartorsinnaalissallutilluunniit kakaotiorsinnaanngussapput imaluunniit assigisaannik sutoriartorsinnaassallutik, 23-p tungaanut.

Naalakkersuisut taamatut oqaaseqarlutik allannguutissatut siunnersuut ima akuerineqarnissaa inassutigaa. Naalakkersuisut neriuutigaa siunnersuut Inatsisartut ataatsimiititaliamut peqqissaartumik suliaassanngortissagaat:

**Allannguutissatut siunnersuut: Inuusuttut 18-it inorlugit ukiullit sumiiffini imigassaq pillugu akuersissutilinni nal. 23-p tungaanut isersimasarsinnaaniassammata Imigassaq pillugu Inatsisartut inatsisaat nr. 35, 23. november 2017-imeersumi §20 imm. 4-mik allannguinnissamut siunnersuusiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

*Oqal. 53:*

Inatsisartuni ilaasortat Justus Hansen aamma Randi Vestergaard Evaldsen siunnersuummik nassiussipput niuertarfiit imigassanik aalakoornartortalinnik nioqquteqarsinnaaneranut ammasarfiit allanngortinnissaanut.

Naalakkersuisut isumaqataapput imigassamik aalakoornartortalimmik imertariaaseq allanngortittariaqartoq. Imerpallaarneq ajornartorsiutaavoq annertoq inuusuttunullu, inersimasunut ilaqutariinnullu annertuumik ajoqusiisartoq.

Naalakkersuisut takusinnaavaat imigassamik aalakoornartortalinnik matulernerata nalaani siuleriaartut amerlasinnaanerata tamannalu ilaqutariinnut akornutaasinnaasoq.

Ammasarfiit ulluinnarni arfininngornermilu tallineratigut Naalakkersuisut matulernerani siuleriaartut pinngitsoortinnissaanut kissaat akuerisinnaavaat.

Naalakkersuisut ammasarfiit allangortinnissaat akuerisinnaavaat, taamaasilluni ataasinngornermiit arfininngornermut imigassamik aalakoornartortalinnik pisiniarfiit nioqqteqalersinnaalersillugit nal. 9.00 aamma 20.00 akornanni.

Naalakkersuisut taamatut oqaaseqarlutik inassutigissavaat imatut allannguutitut siunnersuuteqartoqassasoq. Naalakkersuisut neriutigaat siunnersuut Inatsisartut ataatsimiititaliamut peqqissaartumik suliassanngortissagaat:

**Allannguutissatut siunnersuut: Imigassaq pillugu inatsit allangortinniarlugu siunnersuummik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasillutik niuertarfiit imigassamik aalakoornartortalinnik nioqquteqarsinnaalersillugit ataasinngornermiit arfininngornermut nalunaqutaq 9.00-miit nal. 20.00 tungaanut.**

*Oqal. 54:*

Inatsisartuni ilaasortaq Randi Vestergaard Evaldsen imigassamut inatsimmi ussasaarutit inerteqquteqarneranut allangortinnissaanut siunnersuummik nassiussivoq, taamaasilluni ussasaarutit suulluunniit inerteqqutaanerata imaluunniit allamik taama sakkortutigisumik taarserneqarnissaanut inatsimmi imigassat aalakoornartortallit pillugit atorunnaarsillugit.

Imigassamik pilerisaarinermut inerteqqut nutaajunngilaq. Ukiorpassuarni radiukkut tv-kkullu imigassamik pilerisaarinermik inerteqquteqartumik radio aamma tv pillugit inatsiseqarpugut. Nittarsaassisarneq pillugu inatsimmi meeqqanut inuusuttunullu naleqqussakkamik imigassaq aanngajaarniutillu allat pillugit pilerisaarisarneq inerteqqutaavoq.

Naalakkersuisut paasivaat najukkami inuusutissarsiutillit nunanit allanit tunisassiortunit sanilliullugit pitsaannginnerusumik inissisimasut.

Tamanna tunngavigalugu imigassat aalakoornartortallit pillugit pilerisaarutit suulluunniit inerteqqutaanerata atorunnaarsinnissaa imaluunniit allamik taama sakkortutiginnigitsigisumik taarserneqarnissaanut Naalakkersuisut siunnersuut akuersissutigineqarnissaanut innersuussipput. Naalakkersuisut neriutigaat siunnersuut Inatsisartut ataatsimiititaliamut peqqissaartumik suliassanngortissagaat.

*Oqal. 55.*

Kingullertut Inatsisartuni ilaasortaq Randi Vestergaard Evaldsen siunnersuutigaa imigassamut inatsimmit § 28 imigassat aalakoornartortallit niuertarfinni assiaqusersorneqarnerat atorunnaarseqqullugu.

Inatsisartunut ilaasortaq Randi Vestergaard Evaldsen imertariaaseq nunatsinni pingaarnertut ajornartorsiutaanerarlugu oqarmat Naalakkersuisut isumaqatigaat. Ernguttarneq ajornartorsiutaavoq sualuttoq. Taamaattumillu imertariaaseq kiisalu meeqqatsinnut inuusuttortatsinnullu qanoq sunniuteqartarnersoq oqallisigisariaqarparput.

Naalakkersuisut assiaqusersuineq inatsimmik tunngavissalernagu pisiniarfiit kaammattorusuppai namminneq kajumissusertik naapertorlugu imigassat aalakoornartortallit tulluurtumik inissititeqqullugit taamaasilluni ulluinnarni pisiarisartakkanut immikkoortillugit.

Naalakkersuisut inassutigaat assiaqusersuineq pillugu § 28 atorunnaarsinnissaanut akuersissutigineqassasoq, neriutugalugulu siunnersuut Inatsisartut itigartisissutigissagaat ataatsimiititaliamullu peqqissaartumik suliassanngortissagaat.